

# Dithero tsa Tirelano mo Kutlwanong

20/2015 Thero ka Sontata o o bidiwang Palamarum / le dikala tsa mekolane, e le ka 29. 03. 2015

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno, letsatsi le, le kwadilwe mo go Joh. 3:14b-15, le re: "Jaaka Moše a kile a tlhatlosa noga mo sekakeng, gore mongwe le mongwe yo o dumelang mo go ene, a se latlhege, mme a nne le botshelo jo bo sa khutleng."

1. Sefela sa 44 - 42/44
2. Thapelo: Morena, Mopholosi wa rona, wena yo o tsenang mo metseng ya rona, le mo matshelong a rona, tlisa lesedi, o re sedimose tse ka Mowa o o Boitshepo wa gago, re utlwe mafoko a gago, re kgorisiwe ka ona. Amen.
3. Lefoko la Testamente e kgologolo le kwadilwe mo go Jesaya 50:4-9;  
Epistolo ka fa thulaganyong ya 2 e kwadilwe mo go Bafilipi 2:5-11;  
Efangele ka fa thulaganyong ya 3 e kwadilwe mo go Mareko 14:3-8.
4. A go ipolelwe tumelo ya bokeresete!
5. Sefela sa 91 - 84/86
6. Thapelo ya mmadi wa thero.
7. Efangele ka fa thulaganyong ya 1 e kwadilwe mo go Johane 12:12-19, e re: "Kamoso ya re batho ba bantsi ba ba neng ba tsile moletlong ba utlwa gore Jesu o tla kwano Jerusalema, ba tsaya dikala tsa mekolane, ba tswela go mo kgatlhantsha, ba tlhaba mokgosi ba re: 'Hosanna! Go tshegofaditswe yo o tlang ka leina la Morena, yo e leng Kgosi ya Iseraele!' Ya re Jesu a bona eselana, a e palama, jaaka go kwadilwe ga tse: 'Morwadia Sione, o se ka wa boifa; bona, Kgosi ya gago e e tla, e palame eselana ya esele.' Dilo tseo barutwa ba gagwe ga ba a ka ba di tlhaloganya pele, mme ya re Jesu a sena go galalediwa, ya baa gona ba gakologelwang gore dilo tseo di kwadilwe ka ga gagwe, le gore ba di mo diretse. Jaanong batho ba ba neng ba na nae, fa a bitsa Lasaro go tswa phupung, a mo tsosa baswing, ba ne ba ntse ba supa ka ga moo. Ke ka ntlha ya moo batho ba ileng go mo kgatlhantsha, ka ba ne ba utlwile gore ke ene yo o dirileng

sesupo seo. Jaanong Bafarisai ba raana ba re: 'Lemogang tlhe gore ga lo kgone sepe; kana lefatshe lotlhe le mo setse morago.'" Amen.

8. Thero: Barategi ba Morena wa rona Jesu Keresete! Boipolelo jwa baapostolo ke kakaretso e e khutshwane ya botshelo jwa ga Jesu, le ya ditiro tsa gagwe. Le jona jwa kwa Nitsea ga bo raye tse dintsi. Ona a le mabedi a re: Ke tse; ke tse tsa dipogo, tsa loso lwa gagwe. A tse dingwe tse di neng di sa tsenngwe mo maipolelong ga se tse dikgolo? A tsamaya mo godimo ga metsi, a fodisa ba ba itshwenyegileng, le balwetsi, a tsosa baswi, a dira tse dintsi tse di gakgamatsang. Le tse e ne e le tse dikgolo, mme ga di tlhokege mo pholosong ya rona. Go molemo gore re itse, fa Mopholosi wa rona a nonofile go di dira tsotlhe le tseo, mme ga re pholoswe ka go itse tse di diretsweng ba bangwe. Re pholoswa ka go itse le go dumela tse a di re diretseng, jaaka re ipolela ka mafoko a boipolelo jwa kwa Nitsea gore o fologile mo legodimong ka ntlha ya pholoso ya rona.

Ke nnete, mo maipolelong a le mabedi ao re utlwa tse e leng tse dikgolo thata, e le tsa kitso le tumelo e e re pholosang. Dikgang tse di supang ka fa Jesu a tsetsweng ka teng, di re senolela, fa e le Modimo ruri, le motho ruri. Tse di supang dipogo, loso le tsogo, di re senolela tse re di diretsweng, rona ba re leng batho ba ba mo lefatsheng.

Sontaga wa dikala tsa mekolane ke wa eng? O re bontshang? A re reetseng tumiso ya bontsi jo bogolo jwa batho ba ba neng ba kgatlhantsha Morena kwa Jerusalema, e e reng: "Hosanna! Go tshegofaditswe yo o tlang ka leina la Morena, yo e leng Kgosi ya Iseraele!" A tla, a tlhaga kae? A tla, "a amogelwa mo go Mowa o o Boitshepo, a tsalwa ke Maria wa lekgarebe." Ke ka fa a tlhagileng ka teng. A ne a tlelang? A tlela "go bogisiwa metlheng ya ga Pontio Pilato, go bapolelwa mo sefapaanong, go swa, go fitlhoa" kwa Jerusalema. Ke ka moo, fa a gorogile, le go tsena kwa Jerusalema. "Go tshegofaditswe yo o tlang ka leina la Morena!" Bangwe ba ba ba mo kgatlatshang mo tseleng eo ba ne ba bonye, le go itse tsoso ya ga Lazaro mo losong (Joh. 11), ba tswelela go phatlhalatsa kgakgamatso eo, "ka ba ne ba utlwile gore ke ene yo o dirileng sesupo seo." Batho ba lesomo lele ba ba ileng go kgatlhantsha Jesu koo kwa Jerusalema ba ne ba bona, gongwe ba utlwa ka ga kgakgamatso e Jesu a e dirileng ka go fenya loso.

Bogologolo dikala tsa mekolane e ne e le sesupo sa phenyo e e tlisitseng kagiso. Batho ba kgatlhantsha kgosi e e boileng mo tlhabanong ka dikala tsa mekolane, ya re e sena go

fenya baba. Kgosi e e fentseng mo ntweng, fa e boela gae, le bafenyi mo metshamekong ba kgabisitswe ka sekgele sa mahlare a a bidiwang "bay leaves" ka Seesimane. Ka dikala tsa mekolane ba ne ba ipolela gore Jesu ke Kgosi ya kagiso e e fentseng. O fentse loso lwa ga Lasaro, a mo tsosa mo losong. Ba ne ba le teng, fa Jesu a dira kgakgamatso eo. Seo se bolelwa ka mafoko a a reng: "Jaanong batho ba ba neng ba na nae, fa a bitsa Lasaro go tswa mo phupung, a mo tsosa baswing, ba ne ba ntse ba supa ka ga moo. Ke ka ntlha ya moo batho ba ileng go mo kgatlhantsaha, ka ba ne ba utlwile gore ke ene yo o dirileng sesupo seo." Ke ka ntlha ya moo, fa ba mo tumisa, ba re: "Hosana! Go tshegofaditswe yo o tlang ka leina la Morena, yo e leng Kgosi ya Iseraele!" O ka re ba kopa ba re: "O tsositse Lasaro, o re thuse le rona, Kgosi!" Ka go tumisa Hosana ga bone go ne go kopelwa mopalami wa esele gore a kgone go dirafatsa tse a di rometsweng. Ba mo tumisa ka go ipolela gore ke Mofenyi wa loso yo o nang le thata go tsosa baswi, ba bowe ba tshele. Ba a mo tumisa ka gore ke "Kgosi ya Iseraele."

Ka Sontaga ono wa dikala tsa mekolane batho ba re: "Hosana! O re thuse, Kgosi! O thuse le Kgosi eo go dirafatsa se a se rometsweng!" Mme mo bofelong jwa beke ele batho ba ne ba re: "O pholositse ba bangwe, a a ipholose ene, fa e le Keresete Motlhaolwi wa Modimo." Luka 23:35. Le Pilato a utlwa, fa e le Kgosi, jaaka a botsa mo go Mar. 15:12 gore "mme jaanong ke tla dirang ka ene yo lo mmitsang Kgosi ya Bajuta?" Gape a ba botsa a re: "Naare o dirile bosula bofe? Ba goa thata ba re: 'Mmapolele sefapaanong!'"

Lesomo le legolo le le neng la mo amogela ka Sontaga ka go mo tumisa ka gore: "Kgosi ya Iseraele," ka Labotlhano baperesiti ba bagolo, mmogo le lesomo leo ba ganetsanya le Pilato, ba re: Jesu yoo ga se Kgosi ya bone, ba re: "Ga re na kgosi, fa e se Kaisara." Joh. 19:15. Ya re Pilato a ne a kwala sekwalo, le go se tihomela mo sefapaanong; go ne go kwadilwe ga tse: "JESU WA NASARETHA KGOSI YA BAJUTA," ba tla go Pilato, ba re: "Se re: 'Kgosi ya Bajuta' kwala gore ke ene a rileng: 'Ke nna Kgosi ya Bajuta,'" Joh. 19:21.

Ba sentse ka go nyatsa tumiso e e tshwanetseng Jesu. Fa lesomo la amogela Jesu, fa a tsena mo Jerusalema, go ka bo ga supilwe, fa ba rata gore Jesu e nne kgosi ya mo lefatsheng, ene yo o neng a tsosa motho mo baswing, ba gopola gore o nonofile le go ba golola mo pusong ya Baroma. Ga ka diragala, fa bangwe fa gare ga ba ba mo amogetseng

ba ne ba batla gore e nne yo mogolo mo pusong ya lefatshe, le go nna yo o tla tsoseletsa sešwa puso ya Iseraele.

Jesu ga a tla go senya puso ya Baroma ba ba pitlagantseng Baiseraele. Jesu o tliile go senya puso ya ga Satane, go tšhwetla tlhogo ya gagwe. A tla go pholosa batho botlhe ba merafe yotlhe, le go re golola rotlhe mo timelong le mo tatlhegong ya rona. A tla go nna thuananyo go re ntsha mo malong, mo losong, le mo thateng ya ga Satane. A re tshololela madi a a boitshepo a gagwe ka go boga le go swa a se na molato. A rata gore re nne ba gagwe, re nne ka fa tlase ga gagwe mo pusong ya gagwe, re mo direle ka tshiamo mo botshelong jo bo sa feleng, jaaka ene a tsositswe mo losong, a busa ka bosakhutleng. A go tsheogfadiwe yo o tlang mo leineng la Morena!

Lesomo le legolo la tla go mo kgalantsha ka dikalo tsa mekolane, gone o setse a fentse, a amogela mokgosi o mogolo, ka a fentse loso, e seng ka go tsosa motho a le mongwe fela, e bong Lasaro, mme a fenyetsa batho botlhe ba lefatshe lotlhe loso. A ba solofetse gore o tla fenyisa ka go ineela, le ka go ikokobetsa, ka go utlwa Rraagwe ka go ikokobeletsa babogisi ba gagwe! A ba letetse gore o tla fenyisa ka go itshoka a ketekelwa mo go maswe, ka go tsholola madi a gagwe, le ka bokoa jwa mmele? A ke yona tsela e ba e letetseng gore a abelwe sekgele ka yona? Dikala tsa mekolane di kae mo go tseo? A ba ne ba farafara dikala tsa melokane mo tseleng fa pele ga gagwe, fa ene a ne a sikara sefapaano? Fa a ne a tlhatlogela mo thabeng ya Golegotha, ba ne ba le fa kae ba ba tshotseng dikala tsa mekolane? Ba ne ba le fa kae, fa Jesu a ne a neela mowa wa gagwe mo seatleng sa ga Raagwe, gongwe fa a ne a laliswa mo lebitleng?

Tse a di diretseng Lasaro, tota Jesu o nonofile go di re direla fela jalo! O beetse botshelo jwa gagwe mo kotsing e kgolo, a bowa a bo ntsha gape foo. A re: "Ke nna Modimo yo o molemo. Modisa yo o molemo o beela dinku tsa gagwe botshelo, jaaka go kwadilwe mo go Joh. 10:11; leba le mo go 17-18, a re: "E re ka nna ke neela botshelo jwa me gore ke be ke bo tsee gape, ke ka moo Rara a nthatang. Ga go ope o ka bo nkamogang, ke nna ke bo neelang ka bogame. Ke na le thata go bo neela, ke bile ke na le thata go bo tsaya gape. Taolo e ke e amogetse mo go Rre."

Ka ka ntlha ya moo fa re ipolela, re re: "Hosana, o thuse Morena, jaaka a tlhamaletse mo losong lo lo re tshwanetseng, rona batho! Jesu, o re gopole, wena yo o setseng o gorogile mo bogosing jwa gago! O re pholose, ka o tloseditse lefatshe maleo a lona!

Re re: "A go tshegofaditswe yo o tlang mo leineng la Morena!" Go tshegofaditswe Jesu yo o fentseng loso lwa ga Lazaro, le yo o fentseng loso lwa gagwe! Go tshegofaditswe yo o amogetsweng ka Mowa o o Boitshepo, a tsalwa ke Maria wa lekgarebe, go tshegofaditswe yo o bogileng mo metlheng ya ga Pontio Pilato, go tshegofaditswe yo o tllileng go ya sefapaanong, le go re swela mo go sona, le go fitlhwa.

Re a mo ipolela, re re: "Ke Kgosi ya Iseraele!" Ke Kgosi ya dikgosi, ke yo Mogolo go feta bagolo botlhe ba bangwe, - ke Kgosi ya rona yo o neng a rwala serwalo sa mmitlwa, a apesiwa kobo ya bogosi jwa madi a gagwe, e le motho tota jaaka rona. Ke Kgosi ya lefatshe lotlhe. Mo nakong ya loso lwa gagwe lefatshe la apara lefifi, ka tsogo ya gagwe letsatsi la phatsimisetsa lefatshe lotlhe. Madi le metsi a ne a tswa mo letlhakoreng la gagwe gore re tlapisiwe, re tlmamisediwe mo tumelong mo kolobetsong le mo selalelong se se boitshepo.

Sontaga wa dikala tsa mekolane o re biletsa go amogela Jesu yo o fentseng loso, re atamele mo selalelong sa gagwe se se boitshepo ka pelo e e tlhologelelwang go tla ga gagwe. Ka metlha fa re ja mmele wa gagwe, le go nwa madi a gagwe re ntse re opela, re re: "Hosana, go tshegofaditswe yo o tlang mo leineng la Morena!" Ke ene yo o tlang, a solofetsa go nna teng kwa ba le babedi, gongwe ba le bararo ba kopanyeng mo leina la gagwe. Re setse re abetswe phenyo go fenya maleo le loso ka thata ya mmele le madi a gagwe mo selalelong se se boitshepo. Ke gona re tlmamisediwang mo tumelong gore re tsamaye mo tseleng ya gagwe jaanong le ka bosakhutleng. "Go tshegofaditswe yo o tlang mo leineng la Morena!"

Re retologa go bona tiro ya gagwe e e gakgamatsang, gape re tsholetse ditlhogo go letela go bowa ga gagwe, le tsotlhe tse Jesu a di dirang ka metlha. Re tlhologelelwa go abelwa Selalelo ke ene, le go tsamaya le ene tsela ya bofelo go ya mo phuthegong ya baitshepo e e setseng e kgobokantswe bogologolo, re kgobokanyediwe rotlhe mo go yona ka go amogela Jesu ka tumelo, fa a tla mo go rona. Go tshegofaditswe yo o tlang mo leineng la Morena, hosana mo godimodimong! Amen.

9. Thapelo: Morena Jesu Keresete, tla, Morena wa rona, yo o neng wa boga mo metlheng ya ga Pontio Pilato, wa swa, wa fitlhwa. Hosana! O re pholose, Morena. O tle mo go rona ka fa tsholofetsong ya gago, o re abele botshelo jo o bo tshotseng mo diatleng tsa gago, o re jese ka mmele wa gago, o re nose ka madi a gago a e leng khumo e kgolo. Hosana kwa godimodimong! Amen.

Thapelo ya Morena: Rara wa rona yo o mo legodimong ...

10. Sefela sa 89 - 82/104

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke M. N. Mntambo, ka ngwaga wa 2014.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.